

敦夙好齋詩全集

敦夙好齋詩初編卷三

己亥正月至
庚子三月

漢陽葉名澧翰源著

城南集三

初春雪後邀客小酌

開歲值餘霽夕日耀廣除嘉朋不遐棄集我堂東隅索
居屬多感終日寡所娛萬物各有匹不樂毋乃愚几上
列明燭齋中烹枯魚綿綿夜未央陶陶情相於暫此友
生愜惜未伯氏俱停觴忽不語鴻鴈鳴天衢

讀養浩齋詩

并序

於徐工部

啓山

處得貴池桂君超萬所著詩讀紡車行

及太夫人建坊諸作願見其人焉工部曰此循吏也

相去未千里不得交其人手持一編詩藹然情相親春
華有榮落不彫惟本根溝澮有盈涸何派非昆侖生人
百歲間藐焉獲此身念彼高厚德至樂惟天倫家庭日
陶淑語言能不真以茲定訐謨詩教所以尊醴泉涌地
上羣飲忘其醕撫字何足勞永懷鞠育恩

聞張亨父自楚歸閩

聞說七閩客西樓曾賦詩大江莽風雪孤艇竟何之易

灑途窮淚難爲天問詞燕山無夢到何以慰相思

花朝夜坐憶孔宥函二首

忽憶孔平仲迢遙淮水湄相思今夜月重和去年詩杯
酒成陳迹江鴻慰遠思名山有事業千古復何疑

淮左潘夫子君歸昨過存斯人留宇宙吾道有崑崙鬢
髮今餘幾孤絃孰與論天涯數知己何日共青樽

讀浮邱閣詩柬湯海秋並寄潘先生及張孔二君

二首

憑几欲思卧得君詩朗吟畢生無嗜好文字託幽深但

得青樽共從教白髮侵離騷二十五我自樂南音

潘孔阻淮甸張郎復海陬嗟予中夜夢每與數君遊離
索詩情苦丹鉛樂事求因風感幽獨相望屢搔頭

題明人詩社圖卷

并序 番禺黃蓉
石刑部玉階所藏

此卷凡二圖卷首有陳子文太守奕禧題識云得於安
邑舊家前題某園詩社圖惜園名不存無可考辨癸酉
十月裝成書姓名於卷首凡廿四人失其二仍舊注也
第一謝君廷循第二泰和陳公循第三安成李公時勉
第四吉水周公述第五泰和王公直第六廬陵楊公士

奇第七建安楊公榮第八金谿王公英第九

名第十文

江錢公禮第十一鄆城呂公鍾第十二靈寶許公進第

十三陽曲周公經第十四周公曾第十五周公孟十六

睢州李公孟陽第十七臨淮顧公佐第十八

名第十九

長洲吳公寬第二十祥符王公鑑第二十一烏程關公

瑾第二十二舒城秦公名悅第二十三呂君紀第二十

四呂君文英吾友黃君得此重爲題曰明人詩社圖

幾社雄江左南園肇粵東百年茲卷在當日浩歌同休

沐宜琴酒林廬繞竹桐燕臺春色盡空憶昔賢風

萬柳堂二首

并序

萬柳堂在廣渠門內東南隅益都馮相國溥別業也一名亦園後歸石侍郎文柱捨僧爲拈花寺康熙朝開博學鴻詞科待詔者時文譙於此相國實爲之倡相國致仕歸諸名流於此餞行其爲詩歌甚富厥後漸就荒圯嘉慶辛未泰州朱野雲布衣鶴年募資新之未三十載又將鞠爲茂草矣

生存華屋處零落歸山邱念彼先民言但爲來者憂遙遙國東門有寺清且幽相公遂初返送者盈道周捨宅

更何年興廢猶轉輶覽物自多感望古嗟何由

鐘磬閤勝地風雅徵舊聞佛力不可保金碧非其真狐
兔穴爲鄰楊柳斯爲薪今墓續古墓千載同灰塵鴉啼
枯樹枝春光愁殺人日落牛羊來漠漠蒼烟昏

再過萬柳堂三首

驟雨新荷宴客辰名花宜笑復宜顰如何尺五城南路

一例東風冷暮塵

元廉野雲右丞希憲宴趙松雪廬疏齋南學士于萬柳堂命家姬劉名解

語花者歌驟雨打新荷曲松雪喜而賦詩爲一時佳話
據明劉氏侗景物略廉右丞萬柳堂趙參謀匏瓜亭栗
院史玩芳亭在草橋豐臺間又吳巖遊中頂詩云已見
田田好荷葉風流憶殺趙王孫湯侍郎右曾自黃村歸
敦乳孖齋詩初編

過草橋詩云右安門外舊池亭別墅參謀堂右丞是明
人及國初諸公皆知右安門外有萬柳堂也馮相國
偶襲其名遂附刊
爲右丞舊址誤矣

詞人觴咏暮春天花嶼蓮塘蹟尙傳讀到迦陵修禊序

風流何似永和年

陳迦陵有萬柳堂修禊序

野鶴飄飄去不回亦園楊柳更誰栽攜尊重過山人宅

高閣春深閱綠苔

有感朱野雲丈也丈昔年補種柳樹於拈花寺畫亦園訪柳圖徧徵題咏

所自居曰

涵秋閣

寄郭羽可翁

青原在江上嵐翠自春冬獨往成高隱誅茅第幾峰當

風寫修竹聽瀑倚孤筇我夢尋君去雲深正曉鐘

望伯兄書

時在陝西方奉丘
備鴈平之命

與君已是經年別濁酒青燈夢未闌古塞風高新使節
春郊花落舊吟壇弟兄中歲睽離易官職崇時報稱難
南望夏雲鴻鴈少不知何日發長安

題畫

分明寫出漢陽山翼際秋高蒼翠間何日結茅山下路
卧聽飛瀑到柴關

寄友

田廬莽寥落此去更何依孤艇在天地放遊無是非笑
辭百里宰歸弄七絃微自有江頭月照君上翠微

送黃牛溪州牧

定宜

還欽州任

燕臺六月槐花黃與君酣歌大道旁叩門話別不相見
鷄旣鳴矣趨歸裝歸裝南指欽州道伏波銅柱蠻雲表
龍門夜半潮聲高橫山秋盡梅花早聞君熟精韓子文
隨身卷軸何紛綸它年儻過潮陽郡爲我荒祠薦白蘋

君補注韓文
公集將成書

贈秦澹如

細業

君住錫山下梁谿門外流高窗瞰飛翠孤艇愛尋秋京

國重相訪詩篇話昔游草堂風雨夕翻羨故人留

昨年史梅

叔赴閩舟過梁谿曾至君家

懷溫伊初

昨宵夢乘月與子上羅浮五百四峰裏蒼茫嵐氣秋我
將攜玉笛吹徹碧雲頭短調不成和相思怨阻脩

陳頌南

慶鏞

黃蓉石

玉階

兩君招飲香山別墅

長夏困溽暑浹旬髮未簪故人飲我酒因之江湖心名
園城南隅遠對西山岑入門若蕭寺但少鐘磬音數松

帶橫流清輝時出林蟬聲傍林杪始知坐處深昔賢慨

不作

舊爲顧南雅
通政薤居宅

嘉會方在今四野望膏雨東郊莽層

陰更約二三子風軒橫夜琴

黃蓉石過談

下馬雨初霽入門槐色深蟬聲催向夕暑氣澹疏林養
拙詩篇在忘憂濁酒斟翠微橫咫尺振策許同尋

夜坐東陳雲伯丈

文述

高林宵氣清殘露時復滴西風何時來蟋蟀鳴我壁卻
憶晚學翁孤燈坐禪寂

元符硯歌爲黃蓉石作

并序

黃君蓉石於戊戌季冬招集同人於元符硯齋爲坡公
作生日以此硯拓本見示屬題遲久未報今年夏社中
適以此題同詠因爲歌之硯製於元符三年側有坡公
銘上有御寶考是年坡公正在儋耳其進奉內廷者蓋
後人事非公自獻也

黃君昨治真一酒元符硯齋爲公壽梅花入夜香滿堂
手持一硯如瓊玖此硯製自元符歲公方銜命投瘴癘
海外文章老更成千古昌黎同一涕黃河幾改東北流

孤臣懸望珠崖陬，虞翻骨相終遭謗。賈讓三策不見收，

見公是年人日聞黃河已復北流詩片石應在鬱林得，隨公飄泊之藤州。

藤州江上月滿天，扁舟夜下蒼梧灘。想公吟嘯於其間，

坐聽江水聲潺潺。琴師去矣不復還，洞天蒼石蛟龍蟠。

公是年有藤州江上夜起對月贈邵道士彥肅詩，道士還都嶠公又作詩送之。白鴈高飛變滄

海，可憐鸛眼依然在。當日何人進御筵，篆文屈曲騰光

彩。鳴呼硯兮硯兮空，雕鑄惜哉不遇女中堯舜年。

高閣

高閣晚來雨不知，殘暑收疏桐當戶。牖蟋蟀變清秋，獨

夜風聲靜深林露氣浮寒門數行鴈幾日過幽州

吾廬

吾廬正秋霽野意上簷楹歸鳥雨中急斜陽峰外晴繞
籬生暝色多竹起寒聲欲續陶公句閒居願未成

題觀音院東園和潘星齋

曾瑩

西山招故人空翠似殘春復訪遠公去逍遙林下塵秋
光渺無際鳥語靜含真擬借長吟地聊爲隴畝民

用陶
句

詩長吟開柴門
聊爲隴畝民

黃蓉石餉羅浮雲霧茶作歌報之

君家五羊城卻愛羅浮峰羅浮之峰四百三十二但見
天邊朵朵青芙蓉清明二月東風早山頭時有雲霧繞
仙兮騎蝶翔洞天笑呼龍子種瑤草清溪口白水門胡
生曾遇黃仙人恨不招我同醉松醪春

嘉慶戊午季冬
杭州胡紹甯遊

飛雲絕頂歸途經清坑口遇黃野人
草笠青衫來相問答見浮山小志

常把長鑱白木柄

白署羲皇以上民

夜束黃蓉石

寂寞風兼雨伊人思若何相思深巷阻獨夜得詩多密
葉滴涼露殘星帶曙河草堂秋色好期子抱琴過

雨後訪吳紅生舍人

葆晉

看西山

高閣對蒼翠雨餘秋滿天鐘聲自鄰寺野色接階前綠
酒故人共青琴古調傳羨君休沐暇於此息塵緣

是日過觀音院東園與蓮衣上人小坐

蓮衣吾鄉人也

經旬不入寺雨後款柴關野水多秋色蟬聲在樹間隔

林山翠落當午梵鐘閒憶否江鄉路烟波有釣灣

漢陽舊有

烟波亭在烟波灣上

寄王亮生

仲璫

鴈聲嘹唳過漁陽極目江天別緒長聞說洞庭秋色好

幾家橘柚染新霜

秋夜懷潘四農師

秋風起遙夜離思鬱以長蟋蟀應涼序皎月升華堂悠
悠淮之水嗟我不得杭念君伏衡茅幽懷誰與彰窮困
五十載無乃天所將陶然一室內陵轍義與黃如何入
我夢顏色失厥常晝讀先生書夜侍先生旁一心結萬
緒在夢焉得詳間關二千里羨彼鴻鴈翔君其保體素
以爲吾道昌

題王文簡公載書圖五首

康熙辛巳公假歸遷葬
載書以行門人朱載震

屬禹之鼎
作圖送行

未得林泉賦遂初
松楸重念舊山廬
歸袞西去渾河路
秋色蕭條薄笨車

池北搜羅富異編
落成書庫是何年
更勞紅豆齋中客

握管殷勤作鄭箋

惠定宇作精華錄訓纂
王氏書目凡一百三種

飛閣峻嶒倚古松
買書談藝自從容
風流諸老消磨盡
誰聽慈仁寺裏鐘

白首飄零朱十存
江湖風味向誰論
金風亭畔他年去
呼起吟魂薦一尊

耕烟筆意亦蕭疏曾見山莊舊畫圖何似濟南秋色好

鵲華峰下大明湖

王石谷所作漁洋山莊圖今藏新城陳氏

雨夜憶東園

東園寂寞地寒蛙自相語定有尋秋人天明一叩戶坐聽蒼松聲前林夜來雨

題李氏別業

別業自疏曠入門蒼翠浮西山新霽後繞屋鳥聲秋看竹孤亭暮聞鐘隔寺幽甯知朝市隱宛在楚江頭

長椿寺明孝純劉太后畫象

法駕迎來歲月遐思陵舊淚已如麻青山寂寞迷荒隴
玉貌殷勤問外家宮闕夢猶悲鶴馭滄桑劫已懣龍華
九蓮更有真容在八里莊前落日斜國朝諸老賦詩以此爲九蓮菩薩象誤矣梧門祭酒法式善陶廬雜錄辨之甚詳九蓮象今在阜成門外八里莊慈壽寺

九日獨坐有感

故人將遠別今日罷登高暮色自蕭槭秋心多鬱陶尊
空彭澤酒袖有呂虔刀明日關河路憐予夢寐勞子曾與蓉石約重陽日復爲詩社于東園竟未果別緒紛如予亦罷登高之興矣

別黃蓉石後寄懷

晤言不知樂別後更如何揮淚辭京國揚帆下潞河所
期在肝鬲莫卽賦槃阿到日梅花好相思入夢多

得黃蓉石津門書

故人回首經旬別忽得津門書數行七十二沽楊柳外
霜風無際鴈聲涼

小除夕得黃蓉石杭州書

江路歲云晏孤舟奈子何北來鴻鴈少南去鷓鴣多庾
嶺見新柳燕關夢玉珂到家將母樂人事莫蹉跎
久不得張亨父消息

西風吹漢水有客泛輕航南望江天闊淒其雨雪涼只
書人不至覓食更何鄉休上松寥閣千秋涕淚長

題姚媒伯變畫梅

蚪枝有本性豈與松柏殊陽春首秉德獨立含芬敷託
根空山中歲月忘已徂我願將此樹植之繞庭隅披衣
坐其下靜想澗閬初冰霜滿天地歲寒心不渝

青陽篇贈內

青陽布和德樹木繁且妍有鳥來中庭將雛巢其間
啾朝與暮繞林飛且還林月照我室瘦妻室中歎從君

十載餘齋身奉衿輦一索未及卜何以承親歡
葛藟附樛木終始相纏綿寶瑟方在御開懷爲君彈

與姚梅伯

三十年華歎倦遊相逢聊復醉高樓眼中賸得殘春景
疏柳飛花滿御溝

敦夙好齋詩初編卷三終

男恩頤校字

敦夙好齋詩初編卷四

庚子五月至
辛丑閏三月

漢陽葉名澧翰源著

鴈門集

將之代州省母留別同人二章

蜚乳乃有羗反哺亦有烏萬族互榮滅骨肉真歡娛遙
遙西北天歷歷代趙都秣我紫駟馬負我金僕姑茲行
詎不壯遊子心鬱紆山川阻溫清常懷我生劬故人各
無語但覺顏色殊再拜謝故人覬勉卽長途

南風絕飛鳥我馬隨風鳴驚沙蔽亭埃曠然千里行入

門別妻孥出門別友生徘徊復徘徊一念千迴縈曉望
居庸塞夜夢長安城長安一輪月萬古中天明我行指
三五三五闕復盈丈夫各有懷羞慕兒女情

和韻

鎮海姚燮
燮 棣伯

桐枝高未秋先有啼秋鳥鳥啼高枝寒在客聞何娛
君動將母思別我長安都落夢中條山天界分蒲姑
桑乾不過代隘壁青盤紆採蘭堪慰心敢怨筋力劬
望雲隔滄海所願吾豈殊奈何子影憐尙此風塵途
大風揚平沙君馬蕭蕭鳴持鞭勸君酒未醉君已行

送君心何如叢柳青方生向君萬絲亂欲理偏結縈
願我夢隨鴈同過遼陽城拂落榆林烟照君孤月明
和君詩未終淚已懷袖盈君西吾不南躑躅夫何情

張亨父亦將有濟南之行賦別

關河明日路馬首各西東嶽色橫天秀邊聲匝地雄驚
心年易逝觸目感多同虛抱澄清願行行念澤鴻

清河寄內

今夜閨中夢先余到鴈門征人倦投宿明發更何邨野
闌春無迹沙飛月易昏北來遊興遠歸日話青尊

沙河感作

省親赴關塞驅馬沙河城我僕沙河居鄰曲來相迎長
幼粗有序各持壺與鬯執手言依依頗解離別情邊風
何處來我馬蕭蕭鳴人語長隄間積潦流縱橫生人有
儔類如水離復并原野漸寥闊仰見飛蓬征

望軍都山懷漢儒盧植

嘗隱居軍都山立黌肆教
授好學者自遠方而至見

太平寰

宇記

盧君昔辭宦浩然事遠適惜哉濟世才甘心就岑寂蒼
蒼軍都山遙帶昌平驛想見環堵中光氣發載籍阿瞞

昔北征酹酒憶餘澤同時鄭司農黃巾爲辟易儒生不
逢時橫經有何益

南口

元人南北口門戶到于今路險天多礙風高晝易陰長
城趨上谷間道問松林策馬頻搔首關河暮色深

夜宿

夜宿長城下涼風月滿天城頭峰四五繞屋氣蒼然軍
馬饒行旅邊亭接市廛時清無鼓角戍卒且安眠

居庸關遇雨

馬頭青見亂芙蓉足底泉聲更幾重極目莫談征戰事
一天風雨度居庸

由彈琴峽至八達嶺下

飲馬將爲出塞吟亂山涼翠逼衣襟關門一夜風吹雨
萬籟蕭蕭不可尋

八達嶺

層嶺插天半遠出居庸上燕雲十六州歷歷如在望回
首薊北門萬井如甕盎一夫據雄關千騎不相讓佳氣
環神皋設險天下壯北走灰嶺口南列紫荊嶂縱橫幾

千里蒼翠各殊狀居民最稀少日畏急泉漲亂崖瀉琮
琤對之神俱王蒼莽風雨中浩歌默惆悵

岔道

踰嶺車輪摧乃止岔道宿沙石莽崎嶇跋涉悲役僕回
望居庸關得此更如東北門延慶通西路宣化肅壯哉
茲藩籬足以絡心腹重關何戕戕艱辛萬夫築歎息諸
營屯斜日散坳牧

榆林

峻嶺東西列南來控白羊泉流爭道路城郭俯青蒼雨

氣催雲聚邊聲入夏涼北風吹馬首沽酒下垂楊

懷來縣

西入嬀州道烟沙入望平泉聲奔涿鹿山勢壓長城麥
晚田家淚烏啼客子情邊亭猶歷歷日落悵孤征

狼山

十里復十里乃至狼山陽我馬不肯前仰鳴天滄浪亂
石積層阜一步千徊徨白日何高高酸風來無方草木
委烽火空洞如洪荒暮行畏豺虎朝行畏雪霜夏序有
如此陰氣何時藏

土木堡

明英宗北狩蒙塵地

天未傾明社蒙塵孰首戎六軍迎駕返兩字奪門功太
息諸璫禍艱難少保忠荒城餘土木邊塞有離宮

沙城

空城日夕霧烟浮亭堠荒涼鼓角收射虎漫多中歲感
聞鷄易動五更愁黃沙入夜飛如雨青草連天畏及秋
邊境百年無鎖鑰諸山常護

帝王州

西水泉小憇

楊柳陰陰野店前前峰微雨撲征鵠十年枉作中泠夢
此是窮邊第幾泉

度鷄鳴山至響水舖

層巒遞奔峭風沙揚縱橫車馬去不息浩浩天邊聲足
底洋河水日夜東南征人家傍山麓水患何時平禾麥
稀播種沙田難爲耕李公石洞渠至今傳其名日午陰
霧散不聞村鷄鳴悠悠白雲裏遊子念所生

上花園

遼蕭后種
花之所

上花園接下花園想見春光徧塞門畫閣朱闌不復見

阜雕飛處夕陽昏

夜達宣化府

秣馬鷄鳴麓斜陽照客鞭聞鐘投野店入饌襟腥羶邊
候殊鄉土山光接市塵荒城小兒女尙說武宗年

宣府道中書所見二首

番帽短後衣角弓雙鐵鏃喃喃復喃喃飲馬長城窟
問爾來何方言自張家口五月過陰山雪花大如手

枯樹營

客行日已午暫憩荒營西土屋兩三間牀竈盈蒿藜老

翁見客來斧薪持作糜問翁何所爲少小事耕犁有田
二十頃可免寒與飢日入娛孫雛日出牧豚鷄生平不
入城骨肉無暫離問客何所爲欲語不能辭仰視烏鳥
翔積我悠悠思

胡家屯對月

寂寞常山月更深自到屏風聲警孤枕露氣上征衣但
覺歲時速那堪烏鵲飛西行指代郡南望是京畿

太平莊

舊名北九場
歸西征駐蹕改今名

王

北九場邊問故營

王師當日此西征居人共享昇平樂地是

天家舊賜名

懷安縣

雲朔依孤衛城樓俯遠村河流七里

橋名

闊天入萬全

縣名

昏邑小人烟少山枯虎穴尊客行亟投宿未夕掩柴門

寄湯海秋

待君久不至我向塞門行衡嶽幾千里風來鴻鴈聲

題山店壁

狂風起朔漠攬轡萬山中天勢臨邊盡河流出塞雄興

事見女志言不采
亡成感歎輪轍自西東
題句邀誰賞勞生一轉蓬

天鎮縣早發

晨氣養霏微宿露時復灑
四山闌無人鈴鐸響中野
初日將東升我馬西北下

娘子城

平原日落見荒城
三姓分居舊列營
莫更白登臺上望
桑乾流盡漢時聲

聚樂堡

聚樂空城在當年
武事崇雲中連輔翼
塞上控威雄代

馬依寒草飢鳥向朔風戰餘憑眺處想見柳林功

詠風

盤盤出廣漠浩浩蕩烟埃石氣千峰亂泉聲萬壑哀搏
鵬失溟渤控鶴想蓬萊蕭瑟長城路空思漢帝才

詠長城月

白骨誰能問漢唐長城入夜恨茫茫如何三五城頭月
不待秋風已似霜

望草地

卽瀚海

戈壁蒼涼鳥不還西行千里是天山人烟斷處沙如海

惟見長空白日閒

大同府

兀兀白登山瀾瀾興雲橋茲郡實雄鎮藩屏燕與遼嚴
關寄將士往代多旌旄覆轍有靖康殷鑒非迢遙百年
遞烽火衰盛如暮朝街衢來珍異歌管爭喧囂轅門靜
鼓角日落風蕭騷總戎行邊來威嚴欽百僚四野正赤
旱想見民氣澆吁嗟牧民者撫馭毋乃勞

九龍照壁歌

在和陽街東琉璃瓦燒五色刻鱗爪之而褒成九龍下盤方池歲旱以池

水澆之輒雨明代王府之照壁也其北爲王城街東華西華二門基址尙存

九龍突起街中央臨風天矯如欲翔云是明代王府地
至今遺壁猶輝煌諸王分藩自高帝窮侈土木恢甲第
百年倏見玉石焚一臺何止千家涕代王之母下邳人
英雄未遇知能真分珪賜爵來雲塞一時意氣嗟無倫
採掠山高人迹少冢墓盡委荆與榛故宮可憐甲申載
傑構當日連雲屯王城北望餘夕照東華西華堪憑弔
天低月黑陰風腥過客時聞山鬼嘯君不見旌旗獵獵
霜天開雲中太守求雨來

白道泉

卽飲馬
長城窟

白道泉聲響若雷武靈霸業已如灰時平不作封侯夢
且向長城飲馬來

雲中城舊址

長城何連連不見羣鵠翔朔方列諸部一城險可當都
護制金河邊歟悲有唐五原達陰山樓堞千里強武靈
詡霸業當日威名揚登高望亭堠橫述何茫茫雲中久
已矣戰蹟吁可傷

繡女村

相傳明武宗曾納
民間女子於此

辛莊南去最消魂衰柳蕭蕭日色昏莫問武皇諸樂府

暮鳥啼處幾家村

征馬

征馬臨關塞黃沙動地來難尋蘇武廟何處李陵臺日
落牛羊下風高鴻鴈回前朝亭堠在迢遞白龍堆

黃花嶺

孤嶺當日午來往稀馬牛亭堠何慘淡盛夏疑霜秋穹
廬市平野洪濛如此不當時血流海直到天盡頭戰場
百萬魂翔翔依茲邱我來履殘沙時見戈與矛狂飆幾
千里白日懸悠悠鳥獸不敢居土囊鳴颼颼乃知乾坤

外陰翳無時休回瞻千山阜綵互恆與幽峩峩古長城
萬里將誰謀

度桑乾河

昨向鷄鳴山下過停鞭西望小黃河渡頭五月皆楊柳
回首青山客淚多

懷黃蓉石

我馬燕山北君家嶺海頭相思不識路飛夢復何由中
歲偏多感高歌無盡愁及關問鴻鴈曾不到羅浮

岱岳鎮

塵鬢消磨久馳驅息未遑勞生厭亭埃下馬問何鄉
麥邊兒飯貂裘賈客衰愁聞歌管沸斜月自虛堂

望句注山

七峰連斗牛山水相鉤帶失勢走飛狐乃達盧龍塞
往代論邊防九塞此爲最可憐西陲關高高限中外
征鴈從南來銜蘆止其內積石何峻嶒萬古青不壞
地脈根鴻濛盤旋氣成噫白雲一線生蒼然滿并代
歷歷古戰場慨想征途邁

廣武驛

漢高祖械繫婁敬地

漢帝平城困陳平計亦忠和親非上策齊虜竟論功廣
武荒屯在匈奴往事空誰憐青冢草長自怨春風

廣武旅夜

小店臨山驛泉聲入夜閒然鐙清客夢得句慰慈顏月
落殘笳響林空倦鳥還喜聞役夫語明到鴈門關

入鴈門關

北走踰千里今登鴈塞頭邊聲當午變馬色及關愁白
日峰頭轉黃雲戰後收卻憐句注外樓堞俯荒陬

到代州

我生已三十未嘗遠行遊北望念阿母晝夜如旋轉上
堂語我父我父未肯留病妻默無言料檢衣與裘弱女
送我出未解雙淚流飲馬古長城行行登代州山川倦
行旅霖雨增阻修我行母未知知我夢來不回瞻薊北
門浮雲莽悠悠

雨後卽景

燕麥青青穗未齊寒沙雨過漲成溪人家一帶山田晚
五月初聞布穀啼

代州雜感三首

事類彙編卷之九
三
我從雲中來百里何蕭條塵沙蔽赤野居人多亡逃大
代未三日霖雨連暮朝屋漏不可居喜見四野苗邊地
少肥沃民力艱且勞秋風一以至禾麥仍飄颻

人爲中原人那識邊民苦敝民立邊防秦皇及主父金
城幾千里戍卒千萬戶怨毒中人心乃欲延萬古斯民
生今日陶穴如樂土終歲一敝裘不識機與杼

鴈門古雄鎮旌旆擁上都民情日澆薄山澤何崎嶇碎
石積廣阜驅馬渺難踰滹沱若平陸一雨旋成漚四城
闌闌少居民無完襦日落萬竈黑穢烟交通衢未秋霜

已降青草變爲枯
邊地殊令節不可以久居

寄蘇賡堂編修

廷魁

酒罷別燕市
馳驅魂夢勞
北來山色壯
南望鴈聲高
天地存詩膽
風霜閱鬢毛
長城歸日近
翦燭話邊壕

登代州城樓放歌

我持一劍幽州來
少年意氣何遼哉
北度居庸達鴈塞
眼中戰跡紛塵埃
長城突兀陵谷改
西極玉門東遼海
萬里空憐舉築勞
秦皇漢帝今誰在
北平久無飛將才
英雄豈子悲千載
蒼茫日落雄州城
滹沱浩浩洪流橫

東望紫荆關趙王遺冢何崢嶸北登廣武道楊家片石
餘威名四郊寥落居人少沙磧無邊蔽村堡黃羊逐隊
游荒原白鴈哀鳴散枯草朔風六月重裘寒邊城入夜
飛霜早邊城岌嶮高入雲墩隍卧戟忘冬春征夫休唱
從軍樂暮角先驚遠道人

一夜

一夜鴈門雨征鴻聲已秋秋風入九月共我去幽州

送李夢湘

宗沆

與子又爲別客懷難自裁河聲盤塞去秋色極天來去

訪滕王閣休登嚴子臺官齋春色滿待我共銜杯

懷姚梅伯

變 梅伯家鎮海時夷匪寇定海其鄰邑也

燕臺不得志云欲返蛟門遊子天涯倦荒城海氣昏隨
身倚長劍無夢共清尊甬上多鼙鼓能無議戰屯

代州雜興四首

彌望黃沙闊雄邊浩劫多陁形低廣武河勢起滹沱碑
碣今餘幾英靈自不磨步兵如可作到此淚如何

漢廷傳酷吏人說郅中郎古柏何年燼蒼鷹一代強由

來守邊塞端在尙循良王者今無外車書達大荒

水經注言

邳都墓在鴈門墓旁
有柏今不可考矣

亭埃亦虛設三關自勝朝寒泉流汨汨衰柳莽蕭蕭南
擁中原固北憑邊漠遙九泥原可閉奚假萬夫驍
廿載抱殘冊登臨眼乍開名山留太古何代少奇才白
日旋如蟻青萍鬱若雷詩歌吾自癖戰跡不須哀

謁孫忠靖公祠

公名傳庭代
州振武衛人

孤忠無地葬松楸廟貌依然祀代州渭水東流風雨夜

魂歸猶自擁貔貅

用公集
中語

書孫公忠節錄後

潼關一出知難返回望燕雲涕淚長四塞幾人嚴鎖鑰
中原從此失金湯青燐極目忠魂杳碧血全家古井涼
可惜清屯遺策在孤臣辛苦議邊防

訪顧亭林先生故居

吳苑論耆舊如君蓋世賢關山窮轍跡著作送餘年經
緯鴻儒業興亡肇域篇卜居曾此地蔓草問荒榛

夜坐偶成

鳳山轉蒼翠向夕繞庭隅月色疑霜雪松聲乍有無詩
情臨塞健病骨入秋蘇作健思爲樂非關物候殊

何處

何處寒砧響西風動夜扉天涯未歸客多少歎無衣

秋風

秋風殊未已有客感宵分木落重城樹笳鳴古塞雲閉
門容養拙來日恐無聞入夢砧聲急歸心逐鴈羣

擬遊柏人巖不果

柏巖碧雲裏我欲策筇遊往日仙靈聚諸峰鐘磬幽萬
松根石起其下有泉流可奈歸期迫清霜滿敝裘

秋日出鴈門關

句注天設險鴈門實雄關立馬望古塞萬峰何盤盤昨
來夏方盛今去秋未殘蚤霜委禾黍哀我民力艱朔氣
來單于際天鴻鴈寒商周頌來王嬴劉搆邊患陵谷聿
已改寂寞懷英賢迄今九域同輪蹄恣往還戍樓送斜
日俯仰悲無端

曉渡桑乾河歌

天星寥落晨光起披裘去渡桑乾水桑乾河外夜雨霜
極目蕭條幾營壘耳邊浩浩風濤來疾如巨壑聲奔雷
中流徜徉不用楫馬毛如蝟鳴何哀承平今已百年久

邊亭蒼莽多楊柳遊客能爲企喻歌羌兒解飲烏程酒
河流嗚咽趨盧溝金臺甲第如雲浮啼鳥驚起千家夢
急管繁絃何處樓

宣化府

宣化雲開氣自豪關門往日肅弓刀幾令帝子俘青蓋
更見將軍著赭袍

明王廷相有赭袍將軍謠爲武宗作也

北狩倉皇窮粉

黛中原辛苦竭脂膏承平莫話烽烟事極目長城故壘

高

朔風

八月初七夜作

朔風起邊塞八月雨霜多地冷時聞鴈秋高始見駝清
商催令序敕勒奏悲歌霄漢深愁思纖纖隱素娥

洋河暴漲阻鷄鳴驛

鷄鳴山下洋河流洋河來自天西頭寒裳日暮行人愁
山風莽莽迴湍咽碎石如斗沙如鏤車輪催傷馬蹄折
誰家之子狂且癡篳篥一曲爲汝悲烏鴉銜肉上天飛
我今無楫將安適烹羊沽酒止今夕濤聲夜打山前驛

鷄兒嶺

明成國公朱
勇敢績處

二水流溫洋一嶺界宣府荒荒百戰場白日照今古霧

雨萌蒿藜鬼火黯黃土一唱上夫墳哀哀彈箏女

正統十三年

都下婦女盛唱上夫墳曲其音悽惋次年土木之戰士卒死者凡十餘萬此其識也詳見沈德符野獲編

軒轅臺

遺址在保安州西南界橋山上見直隸名勝志

丹成上太清涿鹿昔徵兵天地失淳悶山河啓戰爭荒臺臨落日弓劍想威名欲訪咸池樂翱翔有鳳鳴

彈琴峽

山行不十里蒼蒼天多陰勞人倦行旅忽送風中琴草樹映叢蔚宿露沾衣襟萬澗遞幽響秋氣杳以深前峰昨夜宿彷彿聞此音懸崖置荒寺鐘磬不可尋援軫一

以和悵望雲流岑空抱歧路感誰識千載心

仙人石歌

螭螭塞邊曉月白匹馬臨關踏寒色飢鴈聲聲叫朔風
隨風亂落山頭石仙人一去不可尋木蕭蕭兮雲陰陰
曲澗琮琤若急雨天風飛夢蓬萊潯

入居庸關

日落螭螭塞青蒼滿客鞭及關頻策馬度嶺始聞蟬南
國愁多滌邦畿幸有年故人方待我萸菊話尊前

昌平州道中望天壽山放歌

太行山色從西來居庸截嶺雄關開登高一攬幽州盡
神皋萬古盤九垓青草離離沙河土龍虎臺空弔明祖
居然形勝超金陵帶礪山河扼門戶昌平松柏春復秋
蒼蒼佳氣青天浮鑾輿歲時祀典修陳牲埋玉羅羣羞
撞鐘擊鼓飛華旂從臣珥筆鏗琳瑯寶鞍玉勒馳驂騶
水嬉不數梨園儔魚龍曼衍忘百憂十三陵畔人代改
滄桑劫盡叢邱在遊魂已免泣冬青穹碑雲漢猶光采
昨來覽古雲中城豹房虎圈無人耕揚鞭更指土木堡
離宮別館跡如掃一時將才王振與江彬坐擁奴僕施

牙幢五國還羞鑒匪遠幸未青蓋俘遐邦缺牌煌煌更
祖制太阿倒授階爲厲朝宗橋下水潺湲巖滿目荒
雲翳

重陽前一日陳頌南戶部招同戴雲帆

綱孫

劉楚

楨

寶楠

陳卓人立

集飲龍樹寺

以下附錄
入都後作

僧廬夜風雨秋色渺無邊朋輩聯都下歸人在鴈前繞
籬黃菊少對岸綠陰連咫尺東園地聞鐘倍惘然

去秋
東園

之集今在都中者惟
頌南及予二人而已

秋杪送張亨甫南歸

塞上鴈鴻至，悽其風雨涼。
故人將遠別，執手復何方。
海邑晝多霧，燕郊秋未霜。
歸裝無長物，涕淚在詩章。

晤溫伊初有贈

君行自南國，我去朔方遊。
匹馬歸來後，燕關楊柳秋。
萬言猶在篋，去日信難留。
各抱蒼茫感，浮名未足憂。

雨夜獨酌懷伯兄

入冬塵事少，展卷小窗幽。
坐聽燕關雨，渾如澤國秋。
獨吟非寄傲，淺酌亦忘憂。
創憶南征客，今宵何處舟。

寄湯海秋

遙遙復遙遙與君隔山川
白日出復沒積氣周歲年
楚蹙非不親夔蛇亦相憐
離心而同居禮儀豈無愆
百年無離別交道何以全
茫茫畫禹迹寸心結纏綿
纏綿繁誰知巧笑難爲妍
江流不復西童髮不再黑
斂性祛思勞願君語言默

書徐廉峰丈

寶善

詩集後

江亭尊酒罷賓客去何之
昨訪從遊地寒鴉盡日悲
千秋茲卷在孤劍幾人知

丈有看劍圖

風雨鄆山路蕭條墓草

滋

送人之揚州

燕臺秋盡酒人稀
馬首蕭條悵鴈飛
二十四橋風雪夜
攜壺夢我叩柴扉

酒間題郭羽可翁畫竹

郭翁久不至把酒輒相思
貽我屏間竹青青無已時

孔宥函歲暮來自淮上感賦

兩年不見君寤寐習君面
寒風動淮潯將子適畿甸
君來詎不樂執手淚如霰
潘老長已矣爾我尙歡譙
墓草

非一朝積慟無人見城西君舊廬歲時眾花徧門外西
山青坐閱人代倦君今儻過此轅馬有餘戀百年役蒼
昊萬事去如電清夜思鴻鈞七尺未云賤悠悠天際雲
焉識吾所羨

題劉楚楨江亭感舊圖送別

曜靈不東旋江河不西流蒼山閱哀樂杯酒爲千秋落
落長安門識子歲末周我去鴈門塞子將潞水遊相見
輒相別渺若萍與鷗矧乃昔所歡存沒殊明幽令名胡
可知寤寐斯綢繆百年重擔荷豈爲尺寸謀將子無他

言筋力常堅邁浮塵鬱決滌回首孤亭愁

南天

往歲長安道好花春滿闌今來逾上巳飛雪送行人沸
耳笙歌煥驚心羽檄頻南天消息遠愁絕客遊身

孔宥函過訪話別

予以禮部試近時儻
居東城普濟禪林

燕山飛雨雪話別最傷神遊子聽烏鳥歸心逐暮春及
時承色笑閉戶息征塵鐘磬城東路明朝迹已陳

敦夙好齋詩初編卷四終

男恩頤校字

敦夙好齋詩初編卷五

辛丑閏三月至八月

漢陽葉名澧翰源著

南征集一

雄縣

蒼莽燕南路馳驅事遠征
沙聲連大漠帆影動孤城
百戰中原地天涯過客情
瓦橋何處是爲問舊邊營

雄縣有瓦

橋關

夜行趙北口

五更月落驛樓空
楊柳千條水氣中
漁火數船星在靨

十三橋畔雨濛濛

曉過鄭州廢城

微雨忽開霽片月猶升暉
揚鞭指瀛莫夜長馬苦饑殘
星墮淺渚露氣相因依
初蛙遠相叫晨鳥亦已飛
迢遞亭堠外殘火明柴扉

扁鵲祠

蘆荻初抽麥氣涼
鄉村四月賽神忙
歲時合著燕南記
茅屋三間祀藥王

河間府

驅車出河間星殘天宇黑寒風吹廣郊曠望愁登陟燕
南趙北間茲郡實奧域青冀臨其南幽平控其北戰爭
何代無俯仰傷我臆濱海饒魚鹽環郡足耕殖荒哉秦
始皇求仙不可得

馮道墓

賣新絲糴秋穀夷中詩句臣能讀石易李郭易劉禪僧
不與飛鷹儔無才無德癡頑足太師致君果何術四朝
恩遇終平生勸進自詡生靈福木葉山下雲陣愁青衣
昨歸負義侯從容著述免園冊老子見慣百不憂短碑

寂寞骨應朽行人知是長樂叟君不聞人死留名豹留
皮又不見揮刀斷臂誰家妻

交河縣

寥落交河縣征車向午過海風動瀛莫日色淡滹沱草
淺飛鳥疾沙平牧馬多書堂懷董相經術久蹉跎

李道濟舊

建董子書院龔用卿有記在焉

阜城訪嵇康琴臺故址

華陽亭在其側據括地志嵇康遇異人授廣陵散卽

其地也

羈人感令序秣馬思眺臨琴臺歎千載流風悲至今習

習谷風吹莫莫嘉樹陰野兔竄淺草好鳥鳴中林馳情
契往躡撫景含幽心素微不復作遺塵渺難尋落落欲
奚適鬱鬱念所欽曲斷廣陵散淚下誰能禁

景州塔

在開福寺定州志云望
夷塔一在景州是也

浮圖跨重霄知近景州郭據地若堠臺攢空勢如削想
見拾級登縱覽無垠堦太行倚列屏滹沱亘如索俯首
摘星辰仰空礙鳥雀萬井炊烟浮悲風動寥廓緬思開
皇年象教勞工度增修建趙宋佞佛名偶託燕雲十六
州烽火接邊漢中原詠板蕩山河畫參錯車書今大通

時清罷鎖鑰策馬塵埃中傑構悵如昨

德州懷古

三齊聯指臂河朔扼咽喉城郭誰憑險衡漳不斷流荒
原層霧積高壘戰雲收欲問公明易升沈未可謀

管輅
德州人

衛河夜渡

聞雞復宵濟縱目衛河濱車馬各南北舟檣若比鄰天
低星氣澹郭近柝聲頻辛苦橋頭客勞勞自問津

平原縣弔顏魯公

漁陽鼙鼓聲如吼河北諸郡皆不守青天盤盤蜀道難
大唐天子蒙塵走平原義旅何崢嶸逆賊聞之心膽驚
噫吁嘻二十四郡不識顏真卿

東阿舊縣

峰勢起東魯仰望何崢嶸勞勞山中客日夜不憚征太
古亘頑石崎嶇何時平巖谷幾人家時聞有雉鳴禾黍
搖高低澹澹畦烟生半嶺俯斜照寒鴉縱復橫瀟若得
茅舍坐愛松風清

車中望魚山

王摩詰有魚山神女祠歌

敦夙好齋詩初編

卷五

驅車東阿道日午揚沙苦遙見魚山雲風吹欲作雨半嶺青濛濛神女渺何許

汶上客舍別袁希肅同年

修謙

蕭條古亭堠旬日送征輪豈意上書後同爲遠道人京華憐昨夢客驛春餘春汶水悠悠去朝來更愴神

汶上縣弔王彥章

楊劉城頭陣雲黑晉兵日夜窺河北鬪雞小兒捧矢回遞坊驚馬鳴徘徊當時梁將嗟何人軍中獨有王將軍將軍有力猛如虎一槍可辟千萬羣論功不許三日捷

以笏畫地悲聲吞段凝旣畔趙張進朝廷復棄敬子振
叶羸兵數百不救充中都無援難圖存鴟軍連連鄴城
走三軍奏凱行觴酒大蛇中斷事渺茫
見北夢瑣言留皮留
名夫何有漳水悠悠故道非鳥飛擇木尤堪悲三垂不
泯英雄恨殘穴徽陵問夕暉

卞塘夜發

羣動有時息勞者獨不然日入倦投宿夢寐猶山川涼
風澹初夏夜氣來無邊默坐念物節去我無非陳前路
阻且長未往心紛員出門祝天宇厯厯星斗懸

邳州曉行

振策先鳴雞言行下邳路星光動平沙車輪涉寒霧隱
隱村落間蔥蔥江南樹萬麥搖輕颺天水與交互夜色
呈熹微飛禽偶一遇

黃河

黃河奪清淮千古無安流自非濟川才誰與宣房謀瀟
州悲有宋水性驕難休竹塹日不屬蛟龍紛遠遊芒芒
大禹蹟故道今奚求崩騰日南徙昏墊民生憂舳艫濟
輪轉

天庾供神州借黃以注運歲帑泥沙投登高俯楚甸浩
浩滄波愁

清江浦

歲抱流亡感人烟積水餘錢刀聚闌閘南北判舟車夜

靜聞吹角朝餐食有魚吳潘今不作辛苦議河渠明萬曆時

漕臣吳桂芬等修新莊等閘堵築清江浦南隄以禦河水加北岸以禦黃淮河臣潘季馴復經理之而運河遂

爲安流

四月十三日清江浦登舟

客路題詩興未孤登舟浩蕩去江湖布帆合寫當中字

廿載燕臺舊酒徒

板閘舟夜

河流挾長淮，淼淼日向東。
扁舟沂復沿，有如風中蓬。
蓬飛無根蒂，客遊鮮歡悰。
長風起大地，浩白彌太空。
明月襲襲上，萬影孤光中。
羣籟不可極，獨夜憂心忡。

淮安府

月色明東楚，河聲撼驛樓。
人烟低萬戶，茭葦障橫流。
鹽筴緡錢困，逃亡井里愁。
荒臺無客問，酌酒弔韓侯。

淮安弔潘四農師

淮水不西流悲音當我前嗚呼我夫子欲見期黃泉雲
木蔚城堞洄溯生纏緜側聞彌留日念我猶拳拳孤墳
已宿草妻子居無椽蹉跎數十載心血餘斷編至今道
旁兒莫不稱其賢昔遊半寥落知我今何人君其夢中
來夜夜相周旋

寶應別孔宥函

斷蓬逐飄風獨鳥汎中沚契闊有成言夢寐幾時止長
湖一縱柁相隔渺千里晨曦易有窮皓齒焉足恃微吟
重低徊離憂纏骨髓迅濤拍舟來長霞遶天起孤城去

迢迢依依清淮水

舟中遣興

江流莽夕色天氣似新秋岸闊居人少風平去浪柔
古今一瞬轉身世自萍浮萬感來無際飛鳥何處遊

汜光湖夜泊

輕舟日東逝四望驚雷破疾流蹴閘奔急若鐵弩
強青山不到目危隄俯帆檣篙師正無事厭聞濤
瀾狂入夜更喧聒上下青茫茫犬吠何墟落明月
升清光滅燭不成寐但愛湖風涼

召伯湖

長湖靜無風一白界寥廓迅流不可西片艇千丈落逍
遙沙際禽微茫烟中郭草樹浮鬚髭曠觀無嵯嶮搔首
懷謝公餘情悵冥漠

揚州府

蒼茫哀角聲言至揚州府道旁行乞兒對客淚如雨憶
昨廿載前繁華盛茲土朱門連棟橑畫舫競簫鼓樂愛
宵鐘鳴寢忘晨曦吐興臺厭綺羅金盤陋黍稌長隄決
高郵流離萬千戶商賈漸空虛煮海徵求苦酒榭巢飛

鳥歌樓雜宿莽世事不可測虧盈自終古我來斜照中
淒清視天宇孤舟一悲歎目送去來舫

楊州柳

楊州何處無楊柳曾否隋家舊日栽江上春殘飛絮盡
鮐魚風裏晚潮來

擬遊平山堂不果

歐蘇不見漁洋死蕭瑟江關我獨來莫望平山堂畔路
寒鴉飛處幾樓臺

雨夕泊高明寺

晨發維揚郡夕泛茱萸灣逆浪乘中流四望餘驚湍飛
雨颯然至草樹浮寒烟倚舟高明寺始見江南山山色
際霄霓遠近敲螺鬟夜來萬籟急蕭瑟如鳴泉回望霧
露中何處孤禽還

夜雨不止又作

微雨逐江風百蟲迸一響濛濛村樹陰汨汨夜潮長琳
宮未成遊竹林徒結想嘿坐相忘言方寸滋漭漭寂寞
覺後鐘迢迢霧中槩

雨後渡江

沂江得新霽縱目何滔滔片艇浮一葉不畏鼃鼃驕中
央失所向但覺白日高大氣鬱成噫丹碧飛金焦混茫
孰終始消長自暮朝西望岷與峨千里浮烟銷覽茲悟
生理進退隨所遭川流幾時息敢怨吾生勞

京口

水國畫多霧維舟潮落初旌旗屯北府文物自南徐鏤
甕寒烟外金焦夕照餘可憐天塹地過客幾躊躇

丹陽縣

征路時維夏扁舟客感生雲荒梁帝宅草蔓呂蒙城淺

水織儵樂長空倦翮橫化遷總陳迹散目不勝情

陵口

朝雨初晴樹色涼征帆半日去丹陽南朝遺冢今何在
江水東流夕照長

常州懷莊眉叔戶部

縉度

四月風光仍莫春夾隄惆悵雨如塵毘陵耆舊今誰在
獨卧扁舟憶故人

戚墅舟夜

長風駕寥泝積浪如有驅天黑列星隱孤眺臨飛艫寸

心自浩浩何必昆侖墟逝者去不停百歲勞形軀夜氣
養真宰萌芽爭須臾萬象了無朕歸宿將焉如

閭門晚泊

薄暮人聲息停舟水郭西尊前孤燭靜帆外數星低簫
管因風至樓臺隔水迷今宵殘月落多恐有鳥啼

舟夜懷陳雲伯丈

曾僑居吳門
今爲繁昌介

漏盡星稀客夢紛故人回首隔江雲烟波不見寒山寺
何處鐘聲夜半聞

山塘競渡行

山塘五月波聲柔舊傳競渡搖龍舟士女綵服銜舟尾
喧闐市甸猶未休哀絲急管波間發桂楫蘭橈興超越
靈旗飄忽乘風翔回旋欲震蛟螭窟須臾日落華月生
千燈照徹歌筵明星飛電掣勢未已不知漏水金壺盈
東南佳麗吳中美盈盈一帶橫塘水天家財賦百萬強
豈止繁華鬪羅綺錦幃彩幄爭鮮新寒女組織無冬春
可憐故事沿荆楚誰問行吟澤畔人

遲祝子偉不至舟發賦寄

江夜起長望寒燈水驛空故人不可見殘雨倚孤篷風

敦風好齋詩初編

卷五

士

笛來何處離愁與我同
詰朝武林去直渡笠湖東

舟過吳江擬訪家茗生

廷瑄

不果賦寄

扁舟泝吳江
卧病聽寒雨
青峰七十二
雲氣自吞吐
欲造幽人居
蒼茫隔遙浦

祝子偉追予至平望置酒爲別

五月初九夜

水天暮色晴獨泊
平望渡斜陽下
遙村忽與故人遇
杯酒俯遠波
扁舟帶層霧
湖上來雨風
蒼蒼滿草樹
夜靜時聞鐘
沙明止飛鷺
迢遞笠澤雲
惆悵汝歸路
次日野泊再寄祝子偉
乞畫帶脰湖別意

水光澄遠空秋月澹如曙月落天茫茫故人不可遇寫
我圖畫中昨宵泛杯處孤燈照橫舫衣上隔湖露

嘉興道中雨望

布帆南下似征鴻未得鴛湖把釣筒桑葉猗猗蠶事好
人家十萬雨聲中

石門曉雨

烟樹交層暉逶迤送柔艣濛濛朝景開切切渚禽語數
峰隱在遙流雲遞吞吐水氣靜不停蕩空忽成雨百憂
澹孤篷物我了無與

塘棲曉行

川原養夏氣積霽明區寰朝日升平舉桑者何閒閒盈
疇旣蔥鬱流耒復潺湲因思安居者焉識民業艱渺渺
碧雲逝悠悠白鷗還揚舠下清曠迴眺江南山

曉入西湖憇聖因寺

四山合烟霧城郭相縈紆飛禽辨層霄片艇如與俱湖
光自亭毒山氣交吸噓草木蘊靈秀樓閣森晴虛中流
曉光分日出千象舒寸心一蟠際沖漠思太初宣防勞
唐宋風雅懷白蘇淪茗話陳迹僧廊宵雨餘

聖因寺

翠華昔南巡攬勝愜遊賞白頭寺中僧倚杖聽泉響

淨慈寺

夜聞南屏鐘晨憩南屏寺湖氣飛溶溶虛堂納空翠

雷峰塔

一塔對淨慈劫火燒猶在縹渺湖烟中夕陽亂成彩

湖心亭

孤亭屹中流坐看來去艣烟水不分明日夕作風雨

西湖晚歸

敦夙好齋詩初編

卷五

三

待月欲停橈夕嵐倏成翳何處采菱人歌聲在烟際

雨中登吳山

客心感蕭晨悽景已盈目策杖風雨中曠望展局促白
雲蔽遠空雲盡大江續江外千帆低微茫若鷺鷥環城
萬人家井井自相屬豈無金張門巧笑互徵逐茲邦性
喜佛香火遍巖麓海氣騰東南于人亦慘毒暮鐘何處
鳴回首斷峰綠

將渡錢塘江有作

武林三日客魂銷野渡無人自倚橈更欲看潮浙東去

江天風雨暮瀟瀟

望六和塔

王氣臨安盡錢王恨未銷尙留孤塔在終古壓江湖

乘潮渡錢塘江懷會稽杜稼軒

寶辰

片艇疾於鳥蒼茫斜日間風聲齊倒海潮勢急吞山難
語興亡事休辭行路艱故人儻有約直渡剡溪灣

富陽縣

水宿狎濤浪羈愁未可論炎天富陽道孤櫂暮雲昏蒼
竹連漁舍青山倚縣門臨風懷故相欲往薦蘋蘩

董文恭公

誥墓在
城外

富陽舟夜

愛看名山入越中江平潮落更無風孤舟竟夜潺湲響
獨倚篷窗憶謝公

雨中將至桐廬縣

蒼厓吐積霧日夕浩已盈颯颯風雨交森森流波生登
艫展遠眺不見桐廬城蔥翠蔭松柏餘暉江上明嶢嶢
無人境但聞飛泉聲泉飛不可返逶迤盤孤清爾三簪
笠者策牛峰下行問之了不答我心適無營

桐廬江晚望

彩翠莽無際諸峰天外閒懸知卜居者盡日薜蘿間水
鳥銜潮去村童放牧還雷聲殷欲雨野泊訊前灣

七里瀨

青山去千里晝夜風濤昏言經嚴陵瀨逝景難與論陰
飊淒終古石壁蟠孤根紆徐暮嵐合靡迤泉流分喬松
絕無倚長江極天奔想見草昧初偉哉雲雷屯落落羊
裘人哀哀朱鳥魂高臺切霄漢藤蘿復誰捫

嚴州府

七里瀧頭望風波不厭遲山圍孤郡小灘響四時悲斜
日歸鳥特扁舟聽畫眉飄飄孤客興浩蕩復誰期

蘭溪縣夜發

沾得蘭谿酒涼風載客舟援聲日相喚蒼翠幾峰頭欲
訪金華洞神仙不可求卻從殘月裏孤嘯溯清流

九姓船

相傳爲陳友諒諸將之後

鴛鴦寄浮萍蕩漾清波旁仰視孤鶴飛不得相頡頏木
蘭爲舟楫紫檀爲舟檣燈燭垂四角掩映芙蓉粧青山
在窗戶江流與之長往來七百里常山達錢塘畫眉夜

三五招邀少年郎偷生迫水宿不齒于編氓九姓自蕃
衍鴟毒猶未央借問始何代毋乃作法涼我聞王道行
首在耕與桑尺土戒游惰男女皆有常誰爲牧民者悵
望餘慨慷

常山

常山達玉山松杉半天碧巉巖羣石間一線貫阡陌村
舍何連連雞犬聲不隔孤雲逝何方白日感陳迹我行
未云勞眷茲歎歌積嗟爾負販人窮年走絡繹

鉛山河口對月

初月他鄉見中宵客夢賒風波下章貢尊酒憶京華樹
暗歸鴉集山迴去岸斜飄飄羨漁叟一艇足生涯

餘干縣道中口占

綠樹蕭疏古渡頭人家幾處映沙流炎風六月餘干驛
一帶蟬聲送客舟

六月九日抵南昌賦呈伯兄

鴈塞相思秋復春南州重與話風塵中年兄弟多離別
歧路詩歌雜苦辛江渚白蘋隨客棹燕山明月待歸人
他鄉能不增惆悵同是庭闈夢裏身

登滕王閣

帝子問安在風流不可尋
西山望無際日暮感何深
詞賦憐遭遇江濤變古今
憑欄秋色滿蕭瑟萬家碁

聞道

聞道楚山外洪濤怒未休
蛟龍游潏蕩民命幾沈浮
舟斷三巴米雲昏萬戶秋
穹蒼不可問孰解杞人憂

夜坐呈伯兄

不寐聽更鼓宵深暑氣清
流雲含月色高樹引江聲
南北頻奔走年華祇暗驚
天涯有鴻鴈應識弟兄情

題李夢湘富春夜泊圖

西風何蕭蕭蕭蕭生春潮暮潮沂江渚愁茲木蘭橈蘭
橈兼桂槳萬籟聞孤蔣對燭空無慘褻裳誓安往三秋
年復年故人魂夢邊朝辭錢塘渡夜夢漁陽關團團好
明月兩地渺難越宛轉懷袖中亘古長不缺明月缺有
時寸心終不移蓬萊自清淺麻姑徒爾悲秋聲滿江樹
更向南州去一葉浮寒流猿啼曉復暮江上雷填填泉
飛五百灘灘灘響不盡回頭富春山鴻鴈不可極鯉魚
無消息願隨七條絃夜夜寄相憶

題友人舊作珠江曲後二首

百粵山川舊霸圖至今簫鼓數名都可憐
垂柳蕭蕭影啼殺秋風有夜鳥

一曲歌殘舊夢醒瘴烟劫霧望冥冥
銷魂莫更江頭唱多少珠娘掩淚聽

題友人京口待渡圖

城空鐵甕倚斜陽潮落瓜州舊壘荒
日暮江南望江北青天無際水茫茫

敦夙好齋詩初編卷五終

男恩頤校字